

UKA 2017/61: Qarasaasiami nassatassamillu nunatsinni kinaassutsimut ilisarnaammik peqalernissamut atatillugu inatsisiliornerup piaartumik aallartinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

pillugu

Inatsisinut Ataatsimiititaliap

siunnersuutip aappassaaneerreqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Debora Kleist, Inuit Ataqatigiit, Siulittaasuugallartoq

Inatsisartunut ilaasortaq Laura Táunâjik, Siumut

Inatsisartunut ilaasortaq Iddimanngiuu Bianco, Inuit Ataqatigiit

Inatsisartunut ilaasortaq Per Rosing-Petersen, Partii Naleraq

Inatsisartunut ilaasortaq Pitsi Høegh, Siumut, ataatsimiititaliami sinniisoq

1. Siunnersuutip tunuliaqutaa Naalakkersuisullu nassuiaataat

Kinaassutsimut uppernarsaatip nuna tamakkerlugu atuuttussap eqqunneqarnera innuttaasut pisortanut attaveqartarnerannut oqilisaataasinnaanersoq pillugu naliliinermik imaqartussamik kalaallinut inuiaqatigiinnut attuumassuteqarnermut inatsisitigut malittarisassat assigiinngitsut pillugit nassuiaammik suliaqaqqullugit Naalakkersuisut 2016-imi upernaakkut katersuunnermi¹ Inatsisartunit peqquneqarput.

Nassuiaat juni 2017-imi agguanneqarpoq.

Nassuiaat siunnersuuteqartup siunnersuummut tunngavilersuutaani oqaatigineqartutut imatut inerniliivoq:

"Naalakkersuisut naliliipput, innuttaasut pisortanik attaveqarnerat nunagisamik uppernarsaat atorlugu pisariinnerulersinneqarsinnaasoq. Tamanna innuttaasut pisortanut

¹ UPA2016/54

kinaassutsiminnik uppernarsaasinnaanissaminnut ullumikkut assigiissumik periuseqartoqannginneranut atatillugu isigineqassaaq. Aammattaaq inassutigineqarpoq nunagisamik uppernarsaatip taassuma najugaqarnermut uppernarsaatip, ullumikkut assigiinngitsunut atatillugu piumasarineqartartup, pisariaqartinneqarnera taamaatitikkiartuaassagaa. Tamatumani aallaqqaammut pisariaqartinneqassaaq inuit namminneerlutik nunagisamik uppernarsaatiminni paasissutissanut isersinnaanissaat. Tassani inassutigineqarpoq innuttaasoq paasissutissanut taakkuninnga innuttaasunut kiffartuussivik Sullissivik.gl aqutigalugu isersinnaassasoq."

Inerniliinerli taanna nassuiaammi pissutsit piviusut pillugit nalilersuinernut attuumassuteqarpallaarsorinangilaq:

"Nunagisamik uppernarsaateqalernikkut innuttaasut sullinneqarnerat pisariillisarneqarsinnaanersoq apeqqutigineqarnikuvoq. Nalilernerarpoq nunagisamik uppernarsaat inuk pillugu tunngaviusumik paasissutissat eqqaaneqartut atorlugit innuttaasunut sullissinerup ilaanik pisariillisaataasinnaasoq, tamannali qularnaatsumik oqaatigineqarsinnaanngilaq. Kommuneni aamma Namminersorlutik Oqartussani IT'eqarnikkut systemit maanna atorneqartut atorlugit ullumikkut innuttaasut inummut normua atorlugu suliap ingerlanneqarnerani tunngaviusumik paasissutissat pisariaqartinneqartut takuneqarsinnaareerput."

Nuna tamakkerlugu kinaassutsimut uppernarsaammik eqqussinerup minnerpaamik 985.000 kr-inik toqqaannartumik aningaasartuuteqaataanissaa naatsorsuutigisariaqartoq, taakkulu qaavatigut ingerlaavartumik allaffissornikkut aningaasartuutaasussat ilanngunneqassasut nassuiaammi paasissutissiissutigineqarpoq.

Siunnersuuteqartulli illuatungaatigut siunnersuummut tunngavilersuummini oqaatigaa innuttaasunik kiffartuussineq pisariinnerulissasoq nassuiaatip tikkuaraa, taamaalillunilu pisortani allaffissornerup ingerlanneqarnera ataatsimut isigalugu pisariinnerulissasoq.

Nunali tamakkerlugu kinaassutsimut uppernarsaammik atuilernerup allaffissornikkut (malunnaatilimmik) oqilisaataasinnaanerata naatsorsuutiginiissaanut nassuiaat tunngavissiinerarneqarsinnaagunangilaq.

Taamaalilluni nassuiaatip tikkuarpaa suliamik ingerlatsinissami inuup normua atorlugu ullumikkut kommunini aamma Namminersorlutik Oqartussani IT'eqarnikkut atortulersuutit maanna atorneqartut aqutigalugit tunngaviusumik paasissutissat pisariaqartinneqartut takuneqarsinnaareersut.

Nassuiaatip aamma tikkuarpaa inatsisit naapertorlugit aalajangiinerit amerlanersaanni aalajangersimasumik isummernissaq pisariaqartartoq, tamatumani missiliuilluni nalilersuineq immikkullu akuersissuteqarnissamut periarfissat ilanngunneqartussaallutik. Kiisalu kinaassutsimut uppersaatiptunniunneqarnerata kingorna innuttaasup inissisimanera allanngorsinnaasarpog.

Taamaalilluni kinaassutsimut uppersaatipt kisimiilluni suliamik ingerlatsinissaq pisariaarutsissinnaangilaa inatsilluunniit naapertorlugit qinnuteqaammut tunngatillugu innuttaasup aalajangersimasunik pisinnaatitaaffeqarnissaa qulakkeersinnaanagu.

Nassuiaat tamarmiusog isumaliutissiisummut uunga ilanngunneqarpoq.

2. Inatsisinut Ataatsimiititaliap inassuteqaataa

Siunnersuut siullermeerinninnermi taparserneqarluartoq Naalakkersuisullu akissuteqaamminni siunnersuutip akuersissutigineqarnissaa inassutigigaat Inatsisinut Ataatsimiititaliap paasivaa.

Siunnersuutip ataatsimiititaliaq allanik oqaaseqaateqarnissaanik tunngavissinngimmagu, ataatsimiititaliap isumaqatigiittup siunnersuutip akuersissutigineqarnissaa inassutigaa.

Inatsisinut Ataatsimiititaliap taamatut oqaaseqaateqarluni siunnersuut aappassaaniigassanngortippaa.



Debora Kleist
Siulittaasuugallartoq
Inuit Ataatigiit



Iddimangiu Bianco
Inuit Ataatigiit

Laura Táunâjik
Siumut



Pitsi Høegh
Siumut



Per Rosing-Petersen
Partii Naleraq